

## Kalesia

Naoa itəm Pol təmäte tuwin kəm iəfak min ikin Kalesia  
 Nəghatən əkuəkir rəha naoa u Kalesia

?Pah təmäte naoa u? Aposol Pol təmäte naoa u.

?Təmäte tatuwin kəm pah? Təmäte tatuwin kəm niməfak min itəm kotatig pis ikin e nitən Kalesia, inu Ikoniam, Listra, ne Tepe. Pol in təmätuoun niməfak min əh nian in təmaupən maliwək e rəhan naliwəkən min.

?Nəmegəhən tahro nulan nian təmäte? Nəratən asol kit e niməfak e nian əh rəha Pol. Netəm Iaihlua tərət koatən nıpahrienən e Iesu Kristo. Kən netəm Isrel tərət koatən nıpahrienən e Iesu. Məto netəm Isrel neen koatən məmə Iaihlua min itəm kotən nıpahrienən e Iesu, okotəkəike kətəu-pən lou min rəha Moses, tahmen e nəhg-ipənən. İlat kəmoatən məmə Iaihlua min okəkəike kəhg-ipən ilat okəmə kətolkeike məmə okotuwa kətəuatıp e nıganəmti Uhgın.

?Təmäte naoa u o naka? Pol in təmäte naoa u, məmə otəg-ətəuatıp-in nətəligən rəha netəm Isrel itəm koatən məmə Iaihlua min okotəkəike kətəu-pən lou rəha Moses okəmə ilat kətolkeike məmə Uhgın in otosmegəh ilat. Pol tolkeike məmə iəfak min okotıtun məmə nahatətəən in suatıp itəm Uhgın təmöl məmə etənim otətuatıp e nıganəmtin, kən in tatosmegəh ilat e nıkin agien. Məto nolən rəha nəhg-ipənən, o nolən rəha wək əskasik min, o nolən rəha nətəu-pənən lou, kəsotəsmegəhən etənim. Netəm-iasol rəha niməfak rəha Isrel kəmoatəpələh əpəh Jerusalem moatəghat-in nətəligənən min əh. Kən moatən məmə təwir əm məmə Iaihlua min okəsotətəu-pənən lou rəha Moses. Afin e Wək Min 15:1-35.

*Pol* tæmætuoun matæghat kæm ilat

<sup>1-2</sup> Piak min ne winik min itæm nækoatæfak latuænu pisin pisin min ikin Kalesia, io Pol, io aposol kit ræha Uhgîn, ekatæte naoa u, mitahl-ipinæ kæm itæmat. Io ne piatat min neen itæm koatæfak u ikin-u, ekotolkeike mæmæ ekotæn “tæwir” kæm itæmat. Io u inu, itæm Iesu Kristo ne Tata Uhgîn kæmialæs-ipær io mæmæ io ræhalau aposol. Uhgîn u, in tæmilæs-ipær Iesu taiir-pa min e ræhan nimisæn. Sænæmæ etæmim æpnæpin æm kit tæmaun-in io kæn milæs-ipær io, mæto Uhgîn. !Tol næhlan, onækotækæike motæto!

<sup>3</sup> Pæs Uhgîn, u Tata ræhatat, ne Iesu Kristo, u Iæræmæ ræhatat, ilau okuawte-in næwiræn ræhalau kæm itæmat kæn muælæhæu næmælinuæn tætatiḡ otæmat. <sup>4</sup> Iesu Kristo tæmegæhan-in atip mæmæ in otimis o nolæn rat ræhatat, kæn miuw rækis itat e nolæn rat min ne nætæligæn rat min ræha nætueintæn. In tæmimis mæto-inu Tata Uhgîn tolkeike mæmæ in otol mihin. <sup>5</sup> Tol næhlan, tæwir mæ kitat okotænwiwi pik Uhgîn u ræhatat, tatuwin, matuwin, namnun tikæ. æwæh. Pæs otol mihin.

*Namnusæn* Tæwir kitiah æm

<sup>6</sup> Narmæk tæmiwig pik otæmat mæto-inu roiu agin-æh huæ Uhgîn tæmaun-in pap itæmat e næwiræn ræha Iesu, tæmawte-in-pinæ æpnæpin æm kæm itæmat. Mæto roiu itæmat nakotapæs Uhgîn, moatagim, moatætæu-pæn næghatæn eiueiuæ min. <sup>7</sup> Næghatæn min æh sænæmæ Namnusæn Tæwir ræha Uhgîn. Netæmim neen kæmotæuhlin Namnusæn Tæwir ræha Uhgîn moatæn in pisin, kæn katæn mæmæ in namnusæn tæwir, kæn katiuw kalin itæmat lan, kæn katærækin ræhatæmat nætæligæn lan. !Mæto Namnusæn Tæwir kitiah æm, kæn kit min tikæ! <sup>8</sup> Nat æpnæpin okæmæ io, o nagelo kit ræha nego e neai tætamnus-iaræp næghatæn pisin kit min, itæm tæsahmenæn e inun emotæn-iaræp

rækis kəm itəmat aupən, pəs Uhgın otıləs-ipən e Nīgəm Asol. <sup>9</sup> Kən ekisimatip min, matən məmə, okəmə suah kit otamnus-iarəp nəghatən pisin u, təsahmenən e Namnusən Təwir itəm itəmat ninəmotitun rækis, pəs Uhgın otıləs-ipən e Nīgəm Asol.

<sup>10</sup> Rəhak nəghatən əh in təskasik, kən nat əpnapin əm okəmə netənim neen kəsotagienən ron io. Iakolkeike əm məmə niki Uhgın otagien o nəghatən rəhak. Okəmə iatəghat əh məmə netənim neen nīkilat otagien ron io, kən ko sənəmə io iolwək pahrien kit rəha Kristo.

### *Uhgın Təmaun-in Pəl*

<sup>11</sup> Piak min ne winik min, ekolkeike mə ekən-ipinə ətuatip kəm itəmat məmə Namnusən Təwir itəm iatən-iarəp nian rafin sənəmə nat kit itəm təmisipən e nətəligən rəha etənim əm. <sup>12</sup> Namnusən Təwir u, sənəmə suah kit təmos-ipa kəm io, kən məgətun io lan, məto Iesu Kristo əm in təmerəh e rəhk-kapə.

<sup>13</sup> Itəmat ninəmotitun rækis rəhak nolən min itəm ematol aupən e nian ematəfak itimat netəm Isrel. Kən emən mə oekoh rafin netənim min rəha Iesu, mərəkin-ərəkin agin niməfak, kən matol nalpinən əskasik kəm ilat. <sup>14</sup> E nian əh, io ematətul-iækis o nəukət kastom rəha netəm Isrel, itəm rəhak pipi min kəmotəgətun io lan aupən. Emitun taprækis-in io min neen, itəm emotaiir ahmen.

<sup>15</sup> Nat əpnapin ematərəkin pap rəhan min netənim, məto Uhgın təmasəkitun io. Aupən ikin təmitəpun kən mawle rækis io e nian emətətig əh e nərpi rəhak mama. Kən təmuwa e nian ətuatip rəhan, in təmaun-in io mə ekuwa io, rəhan etənim. <sup>16</sup> Kən Uhgın təmerəh e rəhk-kapə, məgətun io e nətin Iesu, məmə oekitun wir in,

---

1:8: 1 Kor 16:22    1:10: 1 Tes 2:4    1:11: Mat 16:17    1:13: Wək 8:3  
1:14: Wək 22:3    1:15: Aes 49:1; Kal 2:7

kən muwīn mamnus-iarəp Namnusən Təwīr rəhan kəm netəm mīn u sənəmə ilat netəm Isrel, katən ilat məmə laihluə mīn. E nian əh, io eməsuwīnən mehm suah kit mə otəgətun io e Namnusən Təwīr əh. <sup>17</sup> Kən io eməsuwīnən əpəh ilis Jerusalem məmə oekehm netəm mīn u kəmoatol aposol aupən. Eməsuwīnən mə okotəgətun io e Namnusən Təwīr rəha Iesu. E nian əh, io eməsou-pis-pən əpəh ikin kit Arepia, kən matig mitəlig-pa mīn muwīn əm latuənu kit, nərgin u Tamaskes. <sup>18</sup> Matuwīn, matuwīn nup kīsil kīnəhaluwa mīnəhaluwīn rəkis un, kən io ematig mitəlig-pən mīn Jerusalem məmə ekehm Pita. Kən eməsətīgən tuwəh, emuatig mios nian fiftin əm. <sup>19</sup> Kən e nian əh, emehm əm Jemes u, pia Iesu, lərəməərə rəhatat, məto eməsəplanən aposol mīn u neen. <sup>20</sup> Iatən pahrien e niganəmti Uhgīn məmə nəghatən u, nīpahrienən, sənəmə neiuəən.

<sup>21-22</sup> Eməsətīgən tuwəh əpəh ilis Jerusalem. Kən uarisig un, emuwīn əpəh nitən Siria ne Silisia. Kən e nian əh, netəmim itəm koatəfak kəm Kristo latuənu pisin pisin mīn nitən Jutia, (nitən asol rəha Jerusalem), ilat kəməsotəplanən əh io motəruru niganəmtək. <sup>23</sup> Məto kəmoatəto əm namnusən u, netəmim neen kəmoatən məmə, “Suah əpəh in əpəh, rəhatat tikimir, təmatoh itat o nəfakən, matərəkīn nəmegəhən rəhatat, kən mətalkut məmə otərəkīn mīn rəhatat nahatətəən. Məto roiu əh, in mīn tīnatən-iarəp Namnusən Təwīr rəha Iesu.” <sup>24</sup> Kən ilat kəmotənwiwi pīk Uhgīn o natimnat mīn itəm in təmol e rəhak nəmegəhən, in təməuhlin-pa io ekol nulan.

## 2

*Aposol mīn neen kəmotegəhan-in wək rəha Pol*

<sup>1-2</sup> Tatuwin, matuwin minos nup fotin tinuwa minuwin rækis un, kæn Uhgin tæmæn-ipa kæn io mæmæ ekæike mitælig-pæn min æpæh ilis Jerusalem. Kæn itimlau Panapas emian kæn miait Taetas itimæhal min mæhaluwin. Kæn emæhaluwin kiet-aræpæn Jerusalem, emotuæfimin itimat netæm-iasol min æm ræha nimæfak. Nian emotæpælæh e nuæfiminæn æh, io ematæn-ipæn wir næghatæn min itæm ekuwin matæn-iaræp kæn Iaihlua min, ilat sænæmæ netæm Isrel. Emæn-ipæn wir natimnat min rafin agin kæn ilat mæto-inu esolkeikeæn mæmæ nikilat otæht mæmæ ræhak næghatæn tæsætuatipæn, kæn moatæn rat ræhak wæk, tol nat æpnarþin æm lan, noan tikæ. <sup>3</sup> Kæn e nian æh, nikik tæmatæht pik mæmæ kætah okotæhai io mæ ekæike mæn-ipæn kæn Iaihlua min, mæmæ okæike kæhg-ipæn ilat. Mæto kæmæsotænæn. Kæn io kit u, Taetas, in etæm Kris, sænæmæ etæm Isrel, kæsæhg-ipænæn æh. Mæto ilat kæmæsotænæn mæ okæike kæhg-ipæn.

<sup>4</sup> Nænæn ræha næhg-ipænæn tæmisi-pæn e netæmim neen kæmoateiuæ æm mæmæ ilat piatat min. Kæn ilat kæmotalkælik wir mæmæ okotehm-tu mæmæ itimat ekoatætæu-pæn æh Lou, o kæp. Mæto itimat enotiet rækis minotuwin o Iesu Kristo, kæn minotol kitiah itimat min, kæn itimat sænæmæ slef ræha Lou. Mæto netæm min æh, nikilat tæmæsagienæn o ræhatimat næghatæn min, kæn motolkeike mæmæ okotægo-pæn itat rafin e Lou ne kastom ræha næfakæn ræha netæm Isrel. Kæn kæmotæn mæmæ okæike kæhg-ipæn Iaihlua min tahmen e Taetas. <sup>5</sup> Mæto emotæn-iæhau ilat mæsotolæn mæmæ ræhalat næghatæn otær maprækis-in ræhatimat. Kæn itimat emotaskælim æskasik næghatæn pahrien tætatig e Namnusæn Tæwir, mæmæ itæmat onækotitun wir.

<sup>6</sup> Kæn netæmim neen æh-ikin katæn ilat mæmæ ilat netæm-iasol min ræha nimæfak, (mæto e nehman ræhak,

etəm tatos nərīg asol, ne etəm təsosən nərīg asol, ilau kuahmen ahmen əm. Kən e niganəmti Uhgın, in təsafinən nərīg min əh). Kən netəm min əh kəməsotəgətunən io e nəghatən wi kit, məmə ekuwin mamnus-iarəp. <sup>7-8</sup> !Kəpəl! Kəməsotolən, məto-inun ilat kəmotitun əm məmə, e nəsanənən rəha Uhgın, in təmİLəs-ipər io məmə io aposol, kən mitahləpis-pən io mə ekuwin mən-iarəp Namnusən Təwir kəm Iaihlua min. Kən e nəsanənən əh, tinİLəs-ipər rəkis mihin Pita, məmə in min in aposol. In otatən-iarəp Namnusən Təwir kəm netəm Isrel.

<sup>9</sup> Kən Jemes ne Pita\* ne Jon, katən iləhal məmə nəukəti niməfak miləhal. Nian kəməhaləplan, kən məhalitun məmə e nəwirən rəha Uhgın, in təmos-ipa wək u e nelmək. Kən kəhaluwa məhalol sekhan etimlau Panapas məmə itimat ekotol əm kitİəh. Kən emotən mə oekotoor wək min. Itimlau oekian muamnus-iarəp Namnusən Təwir kəm Iaihlua min, kən iləhal okəhaluwin məhalən-iarəp kəm netəm Isrel. <sup>10</sup> Kən ilat kəmotən-ipa əm nəghatən kitİəh əm məmə nikitimlau otəkəike matəht ian-rat min əpəh Jerusalem məmə ekuasitu elat. Məto, nikiik tinagien rəkis o wək əh.

*Pol təməhai Pita*

<sup>11-14</sup> Kən uarisig un, emitəlig-pən əpəh ləhau taon kit Antiok. Nian emətətiğ ikin əh, kən Pita təmuarisig min muwa. Kən Pita təmətagwən ilat in min neen koatəfak, məto ilat Iaihlua min. Kən nian netəmim min rəha Jemes, itəm kəmotisi-pən Jerusalem motiet-arəpa, ilat kəmotəhai Pita, motəmə, “Iaihlua min u, okəike kəhg-ipən ilat. Məto okəmə kəsolən, Uhgın okol təsasituən elat.” Kən nəghatən u kəmoatən təmərəkın Pita, mol taulis kən məgin nuwin minən magwən təlmin netəm

---

<sup>2:7-8:</sup> wək 22:21 \* <sup>2:9:</sup> Nəghatən Kris ətuatip tatən nərği Pita ikin-u məmə, “Sifas.” <sup>2:10:</sup> wək 11:29-30

kəsəhg-ipənən ilat. Kən nolən rat əh Pita təmol, miuw e kitat min neen əpəh Antiok, ilat iəfak min u noanol min rəha Isrel, ilat min kəmosos o Pita moatol nolən rəha etəmim itəm tatəghat e nolən kəiu, kən moatəgin netəm kəsəhg-ipənən ilat. Motatig kiuw min e Panapas, təgin min ilat. Kən e nian eməplan məmə ilat kinəsotətəu-pən ətuatipən suatip itəm Namnusən Təwir tatən, kən eməhai-pən əm Pita e niganəmtilat, matən-ipən əskasik məmə, “Nat əpnapin ik etəm Isrel, mətə nəsosən əh rəhatat nolən. ?Kən tahro natəkəike kəm netəm min u kəsəhg-ipənən ilat məmə okəhg-ipən ilat?”

*Etəmim itəm otatəhətə e Iesu, Uhgın in otasitu lan*

<sup>15</sup> Kən e nian əh, io emən-ipən wir kəm Pita məmə nıpahrienən məmə itımlau emiasipən ətuatip e noanol rəha netəm Isrel. Itımlau sənəmə İaihlua mil itəm netəm Isrel nıkilat tatəht məmə ilat rafın nol təfagə mətə-inu kəsotətəu-pənən e lou. <sup>16</sup> Mətə roiu ekiatun məmə Uhgın təsafinən etəmim kit məmə in tətəuatip e niganəmtin mətə-inu in tatətəu-pən ətuatip Lou rəha netəm Isrel. Etəmim itəm tətəhatətə pahrien e Iesu Kristo, in əmun tətəuatip e niganəmti Uhgın. Nətəligən əh in əh, tol itimat min netəm Isrel, oekotəkəike motəhatətə əm e Iesu Kristo məmə ekotətəuatip e niganəmti Uhgın. Uhgın təsafinən itimat mətə-inu ekotətəu-pən Lou, mətə in tətəfin əm itimat mətə-inu ekotəhatətə e Iesu Kristo. Etəmim kit okol təsətəuatipən e niganəmti Uhgın mətə-inu in tatətəu-pən pik Lou.

<sup>17</sup> Itimat u netəm Isrel, kən ekotəhatətə e Iesu Kristo məmə ekotuwa motətəuatip e niganəmti Uhgın. Mətə netəm Isrel neen, nıkilat tatəht məmə itimat nol təfagə mətə-inu esotətəu-pənən lou. ?Tol nəhlan, in Kristo itəm tatol məmə itimat nol təfagə, o kəp? !Kəp! Sənəmə tol

min nəhlan. <sup>18</sup> Məto təfagə pahrien in tol min nulan, okəmə ekətəlig-pən min matətəu-pən lou. Okəmə ekatol min nəhlan, kən io esətuatipən e niganəmti Uhgın. Nolən əh tatəgətun əsas əm məmə io iol təfagə rat. <sup>19-20</sup> Tol nəhlan məto-inu, nian emalkut pik o nətəu-pənən Lou, kən eməplan məmə nolən u təsahmənən məmə tatol io ekətuatip e niganəmti Uhgın. Tol nəhlan, emapəs nətəu-pənən Lou o nuwamən etəm ətuatip. Tahmen məmə emimis, kən roiu e nəmegəhən wi rəhak, Lou təsərəməərəən lak. Emol nəhlan məmə ekol əm nətəligən rəha Uhgın. In tahmen məmə itimlau Kristo, kəmətu-pər itimlau min e nig kəməluau. Nəmegəhən oas rəhak təmimis. Məto emaiir-pa min itimlau Kristo. Kən roiu u, sənəmə io iatəmegəh, məto Kristo in tatəmegəh e nikik. Kən e nəmegəhən rafin rəhak, ekətahatətə əm e Nəti Uhgın, itəm təmolkeike pik io, kən muwa mimis mos megəh io. <sup>21</sup> Nolkeikeən u, Uhgın təmawte-in-pa kəm itat, in iahgın pik. Kən okol esərəkinən nolkeikeən əh itəm Uhgın təmawte-in-pa əpnapın əm. Məto iatəplan məmə itəmat min neen, nəkoatətəu-pən Lou mə otol itəmat nəkotətuatip e niganəmti Uhgın. Məto okəmə nəkoatol nəhlan, kən itəmat nəkotol nat əpnapın əm e nimisən rəha Iesu Kristo

### 3

*Netəm Kalesia kəmotapəs suatip*

<sup>1</sup> !Netəm Kalesia, itəmat ninotalməl pik! ?Pah təmasig itəmat matuwın e suatip eko-eko nəhlan? Emotən-iarəp wir pap kəm itəmat məmə Iesu təmos nahməən e rəhan nimisən otəmat, məto tahrə? ?Okəm-naka suah kit təmos-ipən-os-ipən kəm itəmat kən miuw rəkis itəmat mol itəmat ninotalməl pik? <sup>2</sup> ?Otən-tu kəm io məmə,



Uhgin tamos-ipinā Narmin Rəhan kəm itəmat məto-inu itəmat nakotətəu-pən Lou, o kəp? Kəpə, in tamos-ipinā kəm itəmat məto-inu itəmat nakotahatətə e Namnusən Təwir rəha Iesu Kristo. <sup>3</sup> ?Tahro? ?Nakotalməl pik nəpo lan? Itəmat nəmotətuoun wir nəmegəhən wi rəhatəmat e Iesu Kristo e nasituən rəha Narmin Rəha Uhgin, kən məto roiu, itəmat ninotalkut məmə onəkotapəs, kən motuwa netəm ətuatip e rəhatəmat əm nəsanənən. <sup>4</sup> Nəmoatəto nahməən tēpət məto-inu nəmotahatətə e Namnusən Təwir. ?Nəmotətəto nahməən əh əpnapin əm? Kəp, nahməən əh sənəmə rəha nat əpnapin əm. <sup>5</sup> Narmin Rəha Uhgin təməsolən nat pispis min kəm itəmat məto-inu nəkoatətəu-pən Lou. In təmol məto-inu itəmat nəmotətəto Namnusən Təwir rəha Iesu Kristo kən itəmat nakotahatətə lan.

Nətəu-pənən Lou, ne nahatətəən e Iesu

<sup>6</sup> Otəteliğin-tu nat kit oekən. Suah kit, Epraham, itəm Naoa Rəha Uhgin təməghat-in-iarəp rəkis minu lan məmə:

“Epraham in təmahatətə əskasik e Uhgin, kən tol nəhlan, Uhgin təməən məmə in tətəuətəp e niganəmtin.”

<sup>7</sup> E suatip kitəh əm, netənim itəm koatahatətə e Uhgin, in tətəfin ilat məmə kotahmen e noanol ətuatip rəha Epraham.

<sup>8</sup> Naoa Rəha Uhgin təməən rəkis auppən məmə Uhgin otos Iaihlua min, kotuwa ron mol ilat kotətuatip e niganəmtin e nahatətəən rəhalat. Auppən, Naoa Rəha Uhgin təməniarəp nəghatən wir kit kəm Epraham məmə:

“Otisi-pən e rəham noanol, kən ekawte-in rəhak nəwirən e netənim rəha noanol min rafin e nətueintən.”

<sup>9</sup> Kən Uhgin təməwte-in rəhan nəwirən kəm Epraham məto-inu in təmahatətə əskasik lan. E suatip kitəh min

əm, Uhgın titun nawte-inən nəwirən kəm netəmim itəm koatahatətə pahrien lan.

<sup>10</sup> Məto netəmim min un, itəm nikilat tatəht məmə ilat okotos nəmegəhən məto-inun ilat koatətəu-pən rafin nat naka itəm Lou tatən, netəm min əh, ilat kinotatig rəkis e nelmi nərətən. Tahmen-pən əm e Naoa Rəha Uhgın tatən məmə:

“Netəmim itəm kəsotol ətuatipən natimnat min rafin itəm kotatig e naoa rəha Lou, ilat kinotatig rəkis e nelmi nərətən, kən okotəkəike motos nalpinən kit.”

<sup>11</sup> Kən tol nəhlan, tətuatip əm o kitat məmə suah kit tikə itəm tatuwa tətuatip e niganəmti Uhgın məto-inu in təmətəu-pən Lou, məto Naoa Rəha Uhgın tatən min-nulan məmə:

“Etəmim itəm tətahatətə e Uhgın, in tatuwa tətuatip e niganəmtin, kən in otos nəmegəhən pahrien.”

<sup>12</sup> Nəghatən əh, tatəghat-in nahatətəən rəhatat e Uhgın. Nolən rəha nətəu-pənən Lou, in təsahmen-ahmenən e nolən rəha nahatətəən e Uhgın. In əh, məto-inu nolən rəha nətəu-pənən Lou, tahmen-pən əm nulan, Naoa Rəha Uhgın tatən məmə:

“Etəmim itəm tolkeike məmə otos nəmegəhən pahrien məto-inu tatətəu-pən ətuatip Lou, in otəkəike mol natimnat min rafin agin itəm Lou tatən.”

<sup>13</sup> Netəmim rafin agin kəsotol ətuatipən nat naka itəm Lou tatən. Tol nəhlan, Lou in təmələhəu nalpinən tətatig o kitat rafin, kən kitat rafin kotatig e nelmi nərətən. Məto Iesu Kristo təmimis e nig kəməluau, kən miuw rəkis kitat e nelmi nərətən əh. Iesu in təmos nalpinən otat tahmen-pən əm e Naoa Rəha Uhgın tatən məmə:

“Etəmim kit, itəm kəmohamnu kətu-pər e nig, nolən əh tatəgətun-pən məmə Uhgın in təmöl nalpinən kəm in.”

<sup>14</sup> Məto roiu, Iesu təmimis nəhlan məmə netəmim əpnəpın min rafın, ilat okotatig e nəwırən itəm Uhgın təmən kəm Epraham məmə, in otos-ipən kəm noanol min rəhan. Kən nat əh tol nəhlan məmə inu roiu kitat netəm kotahətətə e Iesu, kitat kotıtun nosən Narmin Rəha Uhgın itəm Uhgın təmən məmə otos-ipən kəm netəmim.

*Uhgın* təmaupən mol nəniəkisən rəhan, məto Lou təmuarisig təsafələn

<sup>15-16</sup> Piak min ne winik min, e nəmegəhən rəhatat, kitat kotıtun nolən u rəha nəniəkisən. Nian suah kit tatol, okol kəsafələn, kəsətu-pənən kit min. E suatıp kitiəh əm, Uhgın təmöl nəniəkisən kit kəm Epraham o rəhan kit noanol. Kən e nəghatən əh, təməsənən məmə Uhgın təmən-iəkis noanol min rafın rəha Epraham, məto təmən əm məmə etəmim kitiəh əm otisi-pən e rəhan noanol, etəmim u, in Iesu Kristo. <sup>17</sup> Kən rəhak nəghatən, nipətın tol nulan məmə, aupən, Uhgın təmən-iəkis məmə otətəskəlīm nəghatən rəhalau Epraham, məto uarisig nup fo-hanrit-tate təmuwin rəkis, kən Lou təmuwa. Məto Lou əh, okol təsərəkınən nəghatən itəm in təmən kəm Epraham, okol təsafələn nəniəkisən rəha Uhgın. <sup>18</sup> Kən okəmə kitat kotatig e nəwırən rəha Uhgın məto-inun kitat koatətəu-pən Lou u, tatəgətun-pən məmə nəniəkisən itəm Uhgın təmöl aupən in nat əpnəpın əm. Məto təsolən nəhlan. Məto-inu kitat kotəplan Epraham in təmətətig e nəwırən min rəha Uhgın məto-inu in təmaskəlīm-iəkis nəniəkisən rəha Uhgın.

*Lou rəhan əh-ikin wək*

<sup>19</sup> Suah kit otəpanətapəh məmə, “?Okəmə tol nəhlan, kənu Uhgın təmos-ipən Lou kəm Moses o naka?” Kən ekıtun nənən kəm itəmat u-roiu məmə nəniəkisən itəm Uhgın təmol kəm Epraham in təmaupən matig, məto Lou in təmuarisig in. Təmuwa məmə otəgətun əm kitat netənim məmə okotıtun məmə kitat nol təfagə rat. Məto Uhgın təmələhəu Lou əh məmə otatig matuwın matuwın mətoarus etənim u noanol rəha Epraham otaiir-pa otat. Kitat kotıtun məmə Lou əh, rəhan wək təwir, məto nikitat otəkəike matəht məmə Lou əh, Uhgın təmaupən mos-ipən kəm nagelo min, uarisig təpanos-ipən kəm etənim kit u Moses. Moses, in suatıp o nos-ipa min Lou kəm itat. Məto nian Uhgın təmol nəniəkisən ilau Epraham, təməsolən nəhlan. <sup>20</sup> Uhgın in təməsolən suatıp kit məmə suah un otəghat kəm Epraham. Məto in ətuatıp əm təməghat mən-ipən nəniəkisən rəhan e niganəmti Epraham.

<sup>21</sup> Kən sənəmə Lou əh təmuwa mə otərəkin nəniəkisən rəha Uhgın. Kəpə, təsolən nəhlan. Okəmə Lou titun nos-ipamən nəmegəhən wi kəm kitat, kən kitat kapotıtun nuwamən kətuatıp e niganəmti Uhgın. Məto təsol mi-hinən. <sup>22</sup> Məto Lou kit tol nəhlan tikə. Məto-inu Naoa Rəha Uhgın tatən məmə nolən rat təməlis rafin kitat. Kən kitat rafin koatətəghl Lou min. Tol nəhlan məmə, suatıp kitiəh əm məmə kitat okotos nəwıran min rəha Uhgın itəm təmən-iəkis rəkis. Kən suatıp u məmə koatahatətə e Iesu Kristo.

*Nian u-roiu* rəha nahatətəən e Iesu Kristo

<sup>23</sup> Aupən, Lou itəm Uhgın təmos-ipən kəm Moses, in təmataskəlim kitat tiəkis, tahmen əm mə kitat kəmotatig e kalapus, mətoarus-pa u-roiu, Uhgın təmerəh e niganəmtitə kotəplan suatıp rəha nahatətəən. <sup>24</sup> Kən Lou əh, in tahmen əm e etəm-iasol kit itəm təmatərəməətə etat, muwa mətoarus-pən nian Kristo təmuwa, məmə e

nian əh, kitat kinotuwa motətuatip e niganəmti Uhgın, mətə-inun, kitat kəmotahatətə lan. <sup>25</sup> Mətə roiu əh, Lou okol təsərəmərə minən etat, mətə-inun nian rəha nahatətəən e İesu Kristo tinəmuwa rəkis.

*Itəmat rafin kitiəh əm e İesu*

<sup>26</sup> Kən mətə-inun itəmat nəmotahatətə e İesu Kristo, itəmat rafin, nenəti Uhgın min. <sup>27</sup> Kən kinol baptais rəkis etəmat, məmə itəmat nakotuwa motol kitiəh itəmat min. Tol nəhlan məmə, itəmat ninotos nolən wır min rəha İesu tahmen əm məmə nəmotalpın nıpətıtəmat e natımnat wi. <sup>28</sup> Kən itəmat rafin ağın nəmotuwa motol kitiəh itəmat İesu Kristo, kən itəmat rafin ninotahmen əm. Təwir məmə kitat kəsotoor minən netəmim, nat əpnarın okəmə in etəm İsrəl o in İaihlua kit, in slef kit o in sənəmə slef kit, in iərman kit o in pətan kit. <sup>29</sup> Itəmat rafin netəmim rəha İesu. Tol nəhlan, itəmat noanol min pəhrien rəha Epraham. Kən e suatıp kitiəh əm, nəwıren min itəm Uhgın təmən-iəkis kəm Epraham, itəmat onəkotos motatig lan.

## 4

*Kitat nenəti Uhgın*

<sup>1</sup> Roiu əh, oekəghat məsin min e nolən rəhatat, oekən muəh nımaa nəghatən lan. Okəmə suah kit, in otimis kənu nətin in otos rəhan nəwıren min rafin, mətə okəmə nətin tatakəku əh, kənu kol təsosən nəwıren rəhan. Nətin tahmen əm e slef kit, nat əpnarın rəhan nəwıren min rafin. <sup>2</sup> In otəkəike mətatig əm e nelmi rəhan min, tatuwin matuwin mətəorus-pən nian rəhan tata təmən in minitun nosən natımnat min itəm rəhan tata təmələhəu kəm in. <sup>3</sup> Kənu kitat min kotahmen-pən əm nəhlan. Aupən kitat kotahmen əm e suakəku əh. Kitat slef min rəha iərmis min itəm kəmoatərəmərə etat. <sup>4</sup> Mətə tinuwa e nian ətuatıp

3:24: Rom 10:4

3:26: Jon 1:12

3:27: Rom 6:3

3:28: Rom 10:12

3:29: Rom 4:13

4:3: Kol 2:20

itəm Uhgın təmən, kən Uhgın təmahl-ipa nətın tuwa, pətan kit təmıləs taiir-pa e nətueintən, kən in matətəu-pən wır natımnat rafın itəm Lou in tatən. <sup>5</sup> Təmöl nəhlan məmə otıkis rəkis kitat u, Lou təməlis ətain itat, kənu Uhgın otəhl kitat, mıləs-irəkis kitat tahmen əm e nenətın ətuatıp mın.

<sup>6</sup> Kənu roiu əh, Uhgın tolkeike məmə in otol pəs kitat kotıtun məmə kitat nenətın mın, təmahl-ipa Narmın rəha Nətın təmuwa e nıkitat mın rafın, kən matol itat kotaun-in Uhgın məmə, “Tata.” <sup>7</sup> O nat əh, kitat sənəmə slef mın əm, məto kitat nenəti Uhgın pəhrien mın. In tatos-ipa natımnat wır mın kəm kitat, itəm in tınəmən rəkis məmə otos-ipən kəm nenətın mın.

*Pol* nıkin titahmə o netəm Kalesia

<sup>8</sup> Aupən itəmat nəmotəruru Uhgın. Itəmat nəmoatəfak əm iərmis mın məmə rəhatəmat uhgın mın, ilat kəmotəlis ətain itəmat, məto ilat sənəmə ilat uhgın pəhrien mın. <sup>9</sup> Məto roiu əh, nınotıtun Uhgın. O təwır ilə məmə ekən nəhlan məmə Uhgın tınıtun rəkis itəmat. ?Məto ekolkeike məmə ekətapəh-tu otəmat məmə nəkotitəlig-pən mın o iərmis mın o naka? Rəhalat nəsanənən tıka, kənu kol kəsotolən-ta nat wır kit kəm itəmat nian kit ne. Təhrol nakotəmə ilat okoatəlis mın itəmat? <sup>10</sup> ?Təhrol itəmat nakotətəu-pən nətua-kəmən rəhalat e nian mın rəhalat, ne məwıg mın rəhalat, ne nian asim mın, ne nup mın rəhalat o naka? ?Nıkitəmat təht məmə okol Uhgın nıkin tagien otəmat ron? <sup>11</sup> !Kəsi nəman! !Io ekatəgın agın otəmat! ! Ekatəplan mə emol wək pik etəmat o nat əpnarın əm!

<sup>12-13</sup> Piak mın ne winik mın, io ekatən əskasik kəm itəmat məmə, aupən itəmat nəməsotatıgən e Lou kit, kən io emuwa mehm itəmat koatatıg, emos nolən rəhatəmat. Eməsətəu-pənən Lou. Kən roiu, ekolkeike məmə itəmat

min onəkotos nolən rəhak, ekəsolən məmə Lou otaskəlīm pik io tiəkis. Itəmat nikitəmat təht u, aupən nian io ematən-iarəp Namnusən Təwir kəm itəmat, mətə-inu nimisən rəhak təmol, kən ekətətig kitat min itəmat. Mətə nat əpnapin məmə io ematimīs e nian əh, mətə itəmat nəməsotolən io ekəto tərət. <sup>14</sup> Nīmisən rəhak təmaləkiamtə itəmat, mətə itəmat nikitəmat təməsəht ratən io, kən məsotən ratən io. Itəmat nəmoatos wīr io moatuwin e nīpəg noanimə min rəhatəmat, təhmen əm məmə io nagelo kit rəha Uhgīn, o io, io Iesu Kristo.

<sup>15</sup> Aupən, itəmat nəmoatolkeike pik io, eməplan məmə okol napotitun nolən nat u, napotos-iarəp əm nīganəmtək u tərət, kawluin ilau itəm təwir kit rəhatəmat, pəs ta-situ lak. ?Mətə tinahrol əh-roiu? <sup>16</sup> Nīkik təht məmə, okəmə naka nəghatən min pahrien rəhak təmol itəmat nakotetəhau io.

<sup>17</sup> Iəgətun eiua min un, koatalkut pik məmə onəkotəuhlin rəhatəmat nətəlīgən moatətəu-pən ilat. Mətə ilat kəsotolən məmə otasitu etəmat. Kotolkeike əm məmə okotiuw rəkis itəmat ron io məmə itəmat onəkotalkut pik o nətəu-pənən ilat. <sup>18</sup> In nat təwir məmə nakotalkut pik o nolən natimnat, mətə nəkotəkəike motalkut o nat itəm in təwir, nat əpnapin ekətətig kitat min itəmat, o esatīgən kitat min itəmat.

<sup>19</sup> Io min neen, io iatəto tərət agīn-əh otəmat təhmen-pən əm e pətən itəm məntaan tinatahmə məmə otemək, matuwin matuwin mətəorus itəmat nakotos nolən ətuatip rəha Iesu Kristo e rəhatəmat nəmegəhən. <sup>20</sup> Ekolkeike pik məmə ekətətig kitat min itəmat u-roiu mətə-inu okəmə ekətətig, okol esagət pikən etəmat. Mətə roiu etatig isəu otəmat nəhlan, kən məruru mə ekahrol nulan masitu etəmat.

*Namsu rəha Heka ne Sera*

<sup>21</sup> Itəmat netəm nakotolkeike pik nətəu-pənən Lou, onəkotuhalpın-tu rəhak nəghatən. ?Nəmotəto rəkis nat naka itəm Lou tatən, o nətotətoən əh? <sup>22</sup> In tatən Epraham itəm təmiləs nətın iərman kəiu. Kit itəm slef rəha pətan rəhan təmiləs, kən kit rəhan pətan ətuatıp təmiləs, sənəmə in slef mətə pətan əh rəhan. <sup>23</sup> Suakəku itəm pətan slef təmiləs in təmaiir e nətəligən əm rəha netənim. Mətə suakəku itəm pətan ətuatıp əh rəhan təmiləs, in təmaiir mətə-inu Uhgın in tinəmən-iəkis rəkis məmə pətan əh otıləs. <sup>24-25</sup> Kən kitat kotitun nənən namsu rəha pətan mil əh kən motəuhlin-pa nıpətın etat. Pətan mil əh ilau katuəgətun nənən mil itəm Uhgın təmol kəm netənim. Pətan u Heka, in ne nətın mın ilat slef mın əm, okətələkiamtə ilat. Kən pətan əh Heka, in tahmen e nənən itəm Uhgın təmol e nitot Sinae əpəh e nitən asol Arepia, ikın əh inəh Uhgın təmos-ipən Lou ikın kəm Moses. Kən in tahmen mın e taon asol kit u Jerusalem itəm netəm ikın kotaskəlīm əskasik Lou, kən ilat kotahmen e slef mın itəm Lou tatəlis ətain ilat. <sup>26</sup> Mətə Jerusalem kit mın əpəh ilis e neai, in tahmen e pətan itəm sənəmə slef, itəm Lou təsəlis ətainən, kən in mama rəhatat. <sup>27</sup> Inu nəghatən kit e Naoa Rəha Uhgın tatən nəhlan məmə,  
 “!Ik u inu, nıməgi-nig, agien!

Ik u inu, nəməsətoən nahməən kit o neməkən, agət əfəmə, mətə-inun nıkim tətəgien!

Ik nəməsiləsən suakəku nian kit ne, mətə roiu əh, nenətim mın tinol tepət tepət agın, taprəkis-in nenəti pətan itəm rəhan iərman təsapəsən.”

<sup>28</sup> Piak mın ne winik mın, itəmat nenəti Uhgın mın mətə-inun təməən-iəkis məmə otol mihin. Itəmat onəkotahmen e Aisak u aupən, nəti Sera. <sup>29</sup> Kən aupən

---

4:22: Jen 16:15; 21:2      4:23: Rom 9:7-9      4:26: Hip 12:22; Nol əpən 21:2,10  
 4:27: Aes 54:1      4:28: Jen 15:4-5; Rom 9:7



suakəku u Ismael, nəti Heka, itəm təmaiir e nətəligən əm rəha netəmim, in təmatərəkın pik suakəku u Aisak itəm təmaiir e wək rəha Narmin Rəha Uhgın. Kənu roiu ne, nolən əh tatuwin əm nulan, ilat itəm slef rəha Lou koatərəkın kitat itəm kəmotaiir wi e Narmin Rəha Uhgın e nahatətəən. <sup>30</sup> ?Məto Naoa Rəha Uhgın təmən məmə naka? In təmən məmə, “Ik onakəkəike mahl-iarəp pətan un slef ne nətin. Ilau kuagim rəkis u ikin-u, məto-inun, nəti pətan əh, in okol təsosən nəwırən kit rəha tata. Nəwırən min rafin rəha tata otuwin kəm nəti pətan itəm sənəmə slef.”

<sup>31</sup> Məto kitat u, kitat sənəmə nenəti pətan slef, kitat nenəti pətan itəm sənəmə slef.

## 5

*Iesu təmikis rəkis rəhan min netəmim*

<sup>1</sup> Nian Iesu Kristo təmikis rəkis itat, təmol kitat məmə Lou təsəlis ətainən kitat. O nat əh inəh, itəmat onəkotəike motətul əskasik. Sotətəu-pənən Lou, məmə otərəmərə etəmat. Lou əh, titaləkiamtə itəmat, məmə itəmat onəkotuwin motol wək min rəhan.

<sup>2</sup> Otətəlig-in-tu io. Io Pol iatən nəghatən u kəm itəmat. Okəmə itəmat onəkotegəhan məmə ilat okotəhg-ipən itəmat, kənu nat u itəm Iesu təmol təsasitu aginən etəmat. <sup>3</sup> Kən io iatagət əskasik otəmat məmə etəmim itəm otegəhan məmə okəhg-ipən in, in otos-ipən atip əm in e nelmi Lou. Kən etəmim itəm tətətig e nelmi Lou, otəkəike matətəu-pən rafin agin natimnat min itəm Lou tatən məmə otol. <sup>4</sup> Itəmat u, itəm nakotalkut-alkut o nətəu-pənən Lou məmə otol itəmat nəkotətuatip e niganəmti Uhgın, itəmat ninotəte rəkis atip itəmat o Iesu Kristo. Itəmat ninotəhən-ipən rəkis məntaatəmat o

nəwiran rəha Uhgın. <sup>5</sup> Kən məto kitat u, okotələhəu-pən əm rəhatat nətəligən e Uhgın, pəs in otol kitat kotətuatip e niganəmtin, məto-inun kitat kotahatətə əm e İesu Kristo. Kən Narmin Rəha Uhgın, in otol itat koatətul əskasik kən motəsahgin mətoarus nat un otiet-arəpa. <sup>6</sup> Nian kitat kotuwa motakul-pən e İesu Kristo, nat əpnapin okəmə etənim kəməhg-ipən o kəsəhg-ipənən, məto nat asol un, in rəhatat əm nahatətəən e İesu Kristo. Nahatətəən əh, in tol kitat kotolkeike Uhgın, motatig katol min nolkeikəən kəm netənim min.

<sup>7-8</sup> Aupən, eməplan itəmat kən mitun məmə itəmat nakotaiu əsanən e suatip ətuatip e nəmegəhən rəhatəmat, məmə nakotətoarus mak, məto roiu, nəmotitəlig. Uhgın təmaun-in rəkis itəmat. ?Tol nəhlan, ekolkeike məmə ekətapəh-tu məmə, pəh min kotaiuosig e rəhatəmat suatip, moatiuw kalin itəmat məmə onakoatətəu-pən min Lou? !Ekitun məmə okol Uhgın təsən-iəhauən itəmat nəhlan!

<sup>9</sup> In tahmen e nəghatən kit itəm katən nulan məmə, “İlat kəmotis noanig rat kit, tinatəwiə, matərəkın nətəligən rəhatəmat.” <sup>10</sup> Məto ekitun məmə nıpahrienən İərəməərə in otol nətəligən rəhatəmat tuwa min mol kitiəh kitat min io. Kən io ekitun wir məmə etənim u itəm tatərəkın rəhatəmat nətəligən nulan, nat əpnapin in etəm-iasol o in etəm ahrol kit, məto Uhgın otol nalpinən kit kəm in.

<sup>11</sup> Piak min ne winik min, nəghatən neen itəm katən məmə io, ekatən-iarəp əh məmə netəm kəmotahatətə e Uhgın okəike kəhg-ipən ilat məmə Uhgın otasitu elat. Məto nəghatən əh, sənəmə nıpahrienən. Okəmə io ekatən-iarəp nəhlan, kən netəm min u itəm koatan itəmat min ilat, nikilat otagien əm ron io. !Məto otəplan-tu!

Netəm Isrel neen, koatərəkın əh io, koatıtəp io, moatoh io, məto-inun io iatən-iarəp məmə nımısən rəha İesu e nıg kəməluau, in əm un, in otosmegəh kitat. <sup>12</sup> !E rəhak nətəlıgən, netəm mın un itəm koatərəkın nətəlıgən rəhatəmat moatən məmə okəıke kəhg-ıpən itəmat, təwır məmə ilat okotuwın motəte-atıp ilat mın!

<sup>13</sup> Məto piak mın ne wınık mın, Uhgın təmaun-in itəmat, kən mıkıs rəkıs itəmat, məmə Lou itəm Uhgın təmos-ıpən kəm Moses in otəsəlısən itəmat. !Otəto wır itəmat! Nıkıtəmat otəsəhtən məmə, “Təwır, io enağım rəkıs e Lou əh. Roiu əh, io ekıtun nolən natımnat rafın itəm nıkık tolkeıke.” Itəmat, onakəsotənən nəhlan. Məto nolkeıkeən rəhatəmat otəkəıke mol itəmat nıkıtəmat tagıen məmə onəkotasıtu etəmat mın.

<sup>14</sup> Nolən əh, in tatətəu-pən wır nəghatən kit rəha Lou, u itəm tıtargəfımın rafın nəghatən pısın pısın mın rəha Lou, in tatən məmə, “Ik, onakolkeıke netəmım rafın, kən matol təwır kəm ilat, təhmen əm mə ik nakatol atıp kəm ik.”

<sup>15</sup> Itəmat onəkotəkəıke katəto wır itəmat. Okəmə itəmat nəkoatol tıməht kəm itəmat mın, nəkotahmen əm e kəı mın, koatus atıp əm ilat mın, kən nəghatən rəhatəmat otərəkın itəmat.

*Nolən rəha Narmin Rəha Uhgın ne nolən rəha netəmım*

<sup>16</sup> Io, ekolkeıke mə ekən nəghatən kit kəm itəmat. Itəmat, Narmin Rəha Uhgın otəkəıke matıt itəmat kən itəmat nakotətəu-pən, kən itəmat məsotosən nolən rat aupən rəhatəmat, itəm nəmotos kəıır-pa. <sup>17</sup> Nolən rat aupən əh, inun, nəkoatol natımnat tərət itəm nıkıtəmat tolkeıke. Məto nolən əh, in tetəhau nolən rəha Narmin Rəha Uhgın. Kən Narmin Rəha Uhgın in təsolkeıke mınən nolən rat aupən kəmotos kəıır-pa moatol. Nolən mil əh kətıoal təməht kəm ilau mın, kən tatol məmə

nəkəsotolən nolən wir min itəm nakotolkeike məmə onəkotol. <sup>18</sup> Sotaluinən nat kit, okəmə Narmin Rəha Uhgın tatit itəmat, kənu Lou in təsəlis ətain minən itəmat.

<sup>19</sup> Kitat kotitun əm nolən rat aupən rəha netənim itəm kəmos kair-pa moatol. Nipitan ne nəman ne, koatit anion ilat min; kən ilat koatol nolən rat rafin itəm tol naulisən o nənən; rəhalat nətəligən tatuwin pik o nolən rat min əh. <sup>20</sup> Ilat koatəfak kəm narmi nat min, moatəmik nərək, moatos təmafah rat min, moatol kilepa, ne. Kənu moatol min timəht, moatəmu, moatet, moatol neməha, moatos-ipər atip əm ilat, moatoor ilat min, kən okəmə rəhalat nətəligən tol pisin pisin, kən ilat koatəhai ilat min. <sup>21</sup> Nikilat tətəkləh-in natimnat rəha netəm pisin, moatənim nənimən min kətapis lan, kən moatol lafet katagien lan o nolən nat tərət min əm, moatol min natimnat tərət min tol nəhlan. !latən min tahmən-pən əm məmə emən aupən məmə, oatəto wir itəmat! Məto netəm koatol nolən min əh, okol ilat kəsotuwmən motatig ahgin nərəməərən Rəha Uhgın itəm tatol əpen-əpenə lan.

<sup>22</sup> Məto noa Narmin Rəha Uhgın itəm tatəwiə e nəmegəhən rəha netənim rəha Uhgın, in tol nulan. Ilat koatolkeike netənim, kən nikilat tətəgien, kənu nəməlinuən tətətig e nikilat, kən rəhalat nətəligən kaifəməh, kən moatasəkitun etənim, kən rəhalat nolən in təwir təwir. Kən netənim kotitun mə ilat netəm ətuatip, koatol noa. <sup>23</sup> Kən ilat netəm mətig. Kən nian nətəligən rat tatig elat, ilat kotətul əskasik, məsotolən natimnat rafin itəm ilat atip kotalkeike nolən. Nolən min u, ilat kotəwir pik, kən nəghatən kit tikə o Lou kit, məmə otən-iəhau itəmat məmə onəkəsotolən natimnat min əh. <sup>24</sup> Kitat u netəm rəha Iesu Kristo, kitat kinəmotapəs rəkis nolən rat min rəhatat, u kəmoatol natimnat min itəm

nətəligən əm rəhatat tolkeike. Tahmen əm nulan mə, kəməht-ipən nətəligən rat min rəhatat e nig kəməluau.

<sup>25</sup> !Kotəplan-tu! Narmin Rəha Uhgın in təmos-ipa rəkis nəmegəhən kit kəm kitat, kən təwir məmə kitat okotaliwək e nolən wir min rəhan. <sup>26</sup> Tərat məmə kitat okotausit motos-ipər pik kitat, motiuw-pər nəratən, moatetet kitat min.

## 6

Təwir məmə kotasitu e katipa əfigəm rəhatat min

<sup>1</sup> Piak min ne winik min, okəmə itəmat kit təme e rəhan nəmegəhən, təwir mə itəmat un, Narmin Rəha Uhgın tatit itəmat, onəkotəkəike motasitu lan motəg-ətuatip-in. Məto onəkəsotagət pikən lan, onəkotəghat mətig əm kəm in, motol məmə nikitəmat min titəhmə ron. Məto otəto min itəmat, məmə nat kitəh əm itəm itəmat nakotən-iəhau etəmin ron, otəseko-pa minən otəmat. <sup>2</sup> Itəmat onəkotasitu nəhlan etəmat min. Onəkotalis kələh nat əfigəm rəhatəmat min. Okəmə nəkotol nəhlan, kən itəmat nakotətəu-pən wir nat naka itəm Lou rəha Kristo tatən. <sup>3</sup> Təsəwirən məmə kitat okotos-ipər atip kitat. Okəmə suah kit nikin tatəht mə “Io, io etəm ağin-əh kit,” etəmin un, nikin tateiuə-in, məto in təruru məsəplanən məmə in nat əpnapın əm. <sup>4-5</sup> Məto itəmat onəkotəike motəplan wir-tu natimnat itəm noatol min. Tol nulan məmə, okol etəmin kit in təsakil atipən rəhan wək ne wək rəha suah kit min. Məto in otəkəike mehm wir rəhan pisin əm wək əupən. Məto-inun, netəmin rəhalat wək min tol pisin pisin. Kən ilat koatos katipa əfigəm pisin pisin min e nəmegəhən rəhalat kitəh kitəh. Məto təwir məmə etəmin kitəh nikin otagien o rəhan wək, okəmə rəhan wək təwir əm.

---

5:24: Rom 6:6; Kol 3:5    5:26: Fil 2:3    6:1: Mat 18:15    6:2: Rom 15:1    6:4-5: Rom 14:12

<sup>6</sup> Itəmat u, təwir məmə itəmat onəkotawte-in natimnat min neen kəm rəhatəmat nəgətun min, itəm koatəgətun itəmat e nəghatən rəha Uhgın.

<sup>7</sup> Oatəto itəmat, soteiuə-in atipən itəmat min məmə itəmat nəkotitun nolən nat ərnapın kit itəm nikitəmat rat aupən nakotolkeike. Kən okol nəkəsotolən ialmə e Uhgın. Ik nəmis noanig naka e rəham nasumən, kən ik onakəhl atip min noan, mun. <sup>8</sup> Etənim itəm tatasum-in nolən rat aupən, itəm kəmos kair-pa moatol, tahmen e noanig rat e rəhan nəmegəhən, in otəkəike məhl noan tərət mun, kənu noanig un, otəe-in, nıpətın u, Nımışən. Məto etənim itəm tatis noanig wir, itəm Narmin Rəha Uhgın təmos-ipən, Narmin Rəha Uhgın otol toe-in, noan wir kit, kən in otəhl. Nərgin noanig un, in Nəmegəhən Lilin itəm namnun tikə.

<sup>9</sup> Sotəpou-inən nolən itəm təwir, məto-inu kitat okotəhl noanig wir əh, e nian ətuatip rəhan, okəmə kəsotapəsən wək. <sup>10</sup> Kən nian min rafin itəm kotitun nolən, pəs koatol təwir kəm netənim rafin, kən motatig katol tərət min kəm netəm min u kotahmen e piatat min ne winitat min e İesu Kristo.

*Namnun nəghatən rəha Pol təmən kəm ilat*

<sup>11</sup> Oekəte rəkis namnun nəghatən rəhak e naoa e nelmək əm.\* Itəmat onəkotəplan məmə letə min rəhak, ilat iahgin min. <sup>12</sup> Netəm İsrəl u koatən məmə okəike kəhg-ipən itəmat, ilat kotalisit əm e niganəmtilat min neen o nat u. Məto ilat koatən nəhlan o nat kitəh əm, məmə netəm İsrəl neen min okəsotolən nərətən kəm ilat. <sup>13</sup> Kən ne nat kit min, netəm min əh, kotolkeike məmə okəhg-ipən itəmat məto-inu kotalisit əm

---

6:6: 1 Kor 9:11,14      6:8: Rom 8:13      \* 6:11: Nian Pol təməte naoa u, in təməghat, kən suah kit min təməte rəhan nəghatən e naoa. Roiu in tatos pen, kən tatəte atip e nelmin.

məmə okotol win etəmat lan. Kən motiuw kalin itəmat, nakotitəlig motuwın min e nelmi Lou rəha netəm Isrel. Məto otəplan-tu, ilat min kəsotətəu-pən wirən natimnat min itəm Lou tatən. <sup>14</sup> Məto io rəhak, io ekəsən wi atipən io o nat kit itəm emol. Məto ekolkeike məmə ekənwiwi əm nat naka İərəməərə İesu Kristo təmol e nian in təmimis e nig kəməluau. O nat əh inəh, nolən min rəha nətueintən okol kəsotiuw rəkisən rəhak nətəligən, kənu netəm e nətueintən itəm kəsotahatətəən e Uhgın, ilat kəsotolkeikeən nolən itəm iatətəu-pən. <sup>15</sup> Okəmə Uhgın in otol suah kit tuwa in etəm wi, kən in otol suah əh, tətuatip e niganəmtin, nat əpnəpin okəmə kəməhg-ipən o kəsəhg-ipənən. <sup>16</sup> Kən roiu, ekatəfak o netəm min u koatətəu-pən wir nəghatən u, ilat noanol ətuatip min rəha Uhgın. İatəfak məmə, pəs nəməlinuən rəha Uhgın ne rəhan nasəkitunən otatig olat.

<sup>17</sup> Rəhak u nammun nəghatən. Io esolkeikeən məmə suah kit otən min nat tərət lak. Məto-inun iatəmik əh nəme nıməgəm itəm kəmaht io e kəpiel apin kən kəmalis io. Nəme nıməgəm min u, tatəgətun məmə io, slef rəha İesu.

<sup>18</sup> Piak min ne winik min, iatəfak məmə İərəməərə İesu Kristo otawte-in rəhan nəwirən otəmat. Əwəh.

## North Tanna New Testament

The New Testament in the North Tanna Language of Vanuatu  
Le Nouveau Testament dans la langue du Nord Tanna de Vanuatu  
copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 14 Jun 2022 from source files dated 13 Jun 2022

46e9a2b5-26b8-5301-a079-623f3a20ef8b